

# La festa chi dà be mincha 500 ons

**Il chantun Grischun ha festagià a sai svesch d'urant quist on cun var 400 occurrenz specificas suot l'insaina da «500 ons Stadi liber da las Trais Lias». Quist marcurdi ha la Regenza grischuna trat ün bilantsch positiv: Raduond 60 000 personas s'hajan partecipadas e «l'identità grischuna» saja gnüda rinforzada.**

D'enumerar tuot las passa 400 occurrenz da quist on giubilar 2024 chi han regordà al giubileum «500 ons Stadi liber da las Trais Lias» impliss ün dret cudesch. Id ha dat dietas, concerts, teaters, publicaziuns, gôs auditivs, cortegis, exposiziuns, prelecziuns, visitas da scolaras e scolaras a Cuaira e bler oter. Ma la fin dals quints es quai bain eir statta l'idea da basa da la Regenza grischuna per quist on festiv, d'organisar bleras diversas festas «in möd decentral ed in tuot las regiuns linguistics». Cun quels plects da Jon Domenic Parolini, il president actual da la Regenza recapitulà in marcurdi a Cuaira amo üna jada las festivitats, e quai in occasiun dad

üna conferenza da medias. In quella han el ed ils capo-organisaturs da la festa trat ün bilantsch ourdvar positiv da l'on giubilar.

**Var 60 000 personas als «Bundstags»** Raduond 60000 personas sajan statts preschaintas fingià be a las set occurrenzas principalas, ils uschè nomnats «Bundstags». Quella calculaziun precauta ha fat Daniel Camenisch, il mainaproget da las festivitats «500 ons Stadi liber da las Trais Lias». Las set dietas festivas sun statts il minz da l'inter on giubilar. Analog als vegls «Bundstags», las dietas politicas i'l Stadi liber da las Trais Lias, sun quellas festas gnüdas organisadas d'urant il 2024 in divers lös – tanter Glion e Valchava, tanter Cuaira e Poschiavo.

Na be pervi da la largia partecipaziun a quels «Bundstags» ha Jon Domenic Parolini trat quist marcurdi ün bilantsch positiv, ma eir sün basa da blers resuns ch'el haja tschüf: «D'urant l'inter on vain nus pudü far in bleras occasiuns eir üna sort appel a la superbgià grischuna ed al liom da la cumünanza.»

## Damain patos – daplü umur

Sustegn per seis bilantsch ourdvar positiv ha il regent eir surgni quist marcurdi da vart istorica. Reto Weiss, l'archivar chantunal, es svesch eir stat

preschaint a bleras occurrenzas ed ha perquai pudü observar ün «rinforzament da l'identità grischuna». El ha però eir remarchà cha quista jada saja gnü festagià cun damain patos e sentiment patriotic co in otras occasiuns ill'istorgia grischuna, ma per la paja cun daplü umur ed intermediaziun. E güst in quel connex ha l'archivar chantunal pudü render attent a la vasta glista da publicaziuns edidas in con-

nex cun l'on giubilar, dal «Atlas da l'istorgia dal Grischun» fin ad ün cudesch cun receipts vegls.

## Cuosts da duos milliuns francs

Ma sco adüna – davo la festa vain il quint chi numerescha minuziusa maing tuot la consumaziun: Tenor indicaziuns da Jon Domenic Parolini restan ils cuosts da las festivitats quista jada i'l rom previs. La Regenza vaiva pla-

funà ils cuosts totals sün duos milliuns francs, finanziats our dals mezs da la lottaria nazionala. Tenor il president da la Regenza grischuna vegna il quint final probabel perfin a restar suot quel import.

David Truttmann/fmr

Una survista da tuot las occurrenzas festivas da «500 ons Stadi liber da las Trais Lias» – eir da quellas chi giran amo ün mumaint – es da chattar sün: 500.gr.ch.

## «L'amur pel Grischun es creschüda»

**Il president da la Regenza grischuna, Jon Domenic Parolini, es stat preschaint a blers arrandschamaints da las festivitats da «500 ons Stadi liber da las Trais Lias». Perquai tradischa'l daplü sia relaziun cul Grischun e che chi vain forsa sün maisa pro el a Nadal.**

**FMR: Jon Domenic Parolini, che muments restan specialmaing in memoria?** Jon Domenic Parolini: Quai sun dal sgüra ils blers inscuters, saja culla populaziun sco eir cun personas invadadas da l'exteriur. A mai restan eir in memoria ils inscuters cullas classas chi sun gnüdas a Cuaira per guardar la Chasa Grischa, visitar il Grond cusagl ed as laschar instruir ill'istorgia civica. Ils uffants han per part eir fat dumondas sorprendentas. Ün scolar ha per exaimpel dumandà, sch'eu la-



Jon Domenic Parolini, president da la Regenza, es stat preschaint a bleras festas da «500 ons Stadi liber da las Trais Lias». fotografia: Matthias Nutt

vura amo alch oter sper mia incumbenza sco regent. Id es simplamaing enorm important da preparar a quella generaziun sün üna partecipaziun democratica.

**Avant bundant ün on vaiva El dit in ün'intervista cha la stipulaziun dal «Bundsbrief» avant 500 ons saja statta üna manifestaziun d'unità. Es quai eir stat il cas pro quista festa?**

Noss'idea es adüna statta quella da nu far be ün unic grond arrandschamaint central, ma dad ir oura illas regiuns. Nus nu vulaivan festagià sco dal 1899 cun ün grond gö festiv a Cuaira e lura eriger ün grond monumaint da Benedict Fontana. Nus vulaivan organisar üna festività plü decentrala e «federala» e vain uschea ragiunt a la fin a daplü personas. Dimena as poja tuottüna nomnar eir quista festa üna manifestaziun d'unità grischuna.

**Apunta, avant decennis gniva fat ün grond monumaint, quasi eir sco algordanza da la festa. Che resta da quistas festivitats?**

I restan tuot las publicaziuns in connex cul giubileum – da receipts istorics fin a publicaziuns scientificas. Da tschella vart craja chi saja reuschi da sensibilisar a la populaziun grischuna pel minz da quist chantun – per sia varietà linguistica e culturala e per seis funcziunamaint democratic. E concernent il monumaint daja amo üna pendenza: Il monumaint sülla Piazza da la Regenza a Cuaira dà l'impreschiun da descriver la fundaziun da las

Trais Lias, el metta però il focus süll'union dal 1471 a Vazarouls. Perquai vain nus l'intenziun da cumpletter il monumaint cun üna tabla chi piglia resguard süllas conclusiuns scientificas resultadas da quist on giubilar. Uschea surgniss eir l'on 1524, culla stipulaziun dal «Bundsbrief», ün'attenziun adequata. Il monumaint laschaina sco ch'el es! Ma id es previs da far ün'aggiunta cun üna tabla.

**Veza hoz il president da la regenza grischuna seis chantun cun oters ögls co amo avant ün on?**

Ferm different forsa na. Ma eu n'ha dal sgüra surgni novas invistas ill'istorgia. L'amur pel Grischun es creschüda amo üna jada! (ria)

**L'amur va eir tras il stomi. Quist on es gnü ed ün cudesch cun receipts grischuns da plü bod. Ha El fingià cuschinà alch tenor quel cudesch?**

(ria) Na, amo nöglia! Ma forsa chi's dà tanter Nadal e Büman ün'ocasiun per provar oura ün o tschel receipt.

Intervista: David Truttmann/fmr

## «Id es stat ün plaschair»

**Cun sia impraia da marketing e comunicaziun ha il Sutsilvan Daniel Camenisch timunà las festivitats da giubileum «500 ons Stadi liber da las Trais Lias». Ed illa retrospectiva conceda il mainaproget da la festa ch'el vezza hoz il chantun Grischun cun oters ögls.**

**FMR: Daniel Camenisch, che es stat per El personalmaing il punct culminant da tuot las festivitats?**

Daniel Camenisch: A mai ha fat impreschiun quista enorma partecipaziun da la populaziun, cun indombrabels agüdants e bleras partecipantas oura illas regiuns. Nus nu savaivan bain na ouravant, scha quai pudess funcziunar,

sch'i darà insomma glied avuonda chi s'identifichescha cun quistas festivitats e pudess contribuir sia part. Illa retrospectiva as vezza chi'd ha propa dat ün enorm ingaschamaint chi'd ha muossà la gronda varietà e la ricchezza dal Grischun. Id es stat ün grond plaschair per mai.

**Che resta concret in memoria ad El personalmaing?**

Per mai esa stat üna grond'onur dad insomma avair pudü cunorganisar quistas festivitats. In 500 ons, pro'l prossem grond giubileum nu pudaina probabel plü organisar la festa! (ria) Eu n'ha impris a cugnuscher meglder il Grischun e m'ha pudü confruntar plü a fuond cun sia istorgia. Eu personalmaing m'ha pudü render consciant quant particular e forsa eir unic cha'l svilup i'l Grischun es stat. E lura am restan in memoria tuot quels bels pur-

trets da las festivitats dals «Bundstags» illas regiuns – chi sun eir stats üna gronda manifestaziun da la ricchezza dal chantun e da l'uschè nomnada «superbgià grischuna».

**Veza El dimena hoz il chantun Grischun cun oters ögls?**

In mincha cas! Eu nu m' d'eira consciant avant, co cha nos chantun s'ha fuormà e sviluppà i'l decuors dals ultims tschientiners. Güst in temps chi sun geopoliticamaing plü malsgürs esa d'eminente importanza da verer che valur cha quel svilup e quella unità democratica han.

**Da s'unir avant 500 ons tanter corporaziuns da differenta confessiun e da differenta lingua es eir fingià gnü valütà sco act curaschus ed innovativ. Pudess il chantun Grischun esser forsa hozindü pa plü curaschus ed innovativ?**

L'istorgia grischuna muossa cha bles gnü fat inandret – forsa eir in moda e maniera visunara. E quai es dal sgüra

üna via chi vala la paina da perseguitar inavant! (ria)

Intervista: David Truttmann/fmr



Daniel Camenisch, il mainaproget da las festivitats «500 ons Stadi liber da las Trais Lias». fotografia: David Truttmann